

宋詩紀事

宋詩紀事

宋詩紀事卷三十四

錢唐 厲鶚 緝

仁和 江源 勘定

任伯雨

伯雨字德翁眉山入舉進士元符中除左正言崇
寧初以黨論謫儋州移道州遇赦提點明道宮紹
興初贈諫議大夫淳熙中謚忠敏

宿西軒

茅簷不動晚風微獨對爐煙枕半敲唯有多情沙上月依
然青瑣照人時

焚香有感

掃地焚香開竹扉
輕煙郁郁閒朝暉
卻思昔日延和殿
對罷曾攜滿袖歸

以上前賢小集拾遺

獨坐

得喪榮枯事悠悠
過耳風此身猶是幻
何物不爲空酒聖
心常醉詩窮語更工
小軒搔首坐斜日
滿窗紅

瀛奎律髓

句

身投魑魅家何在
澤逮昆蟲罪未除

貶昌化和張才叔贈詩

梁溪

林積

積元祐中左中散大夫知福建路

題州宅艤閣

濟川須用楫
罔水戒行舟
四海風波路
安眠是勝游

淳熙三山志

徐大正

大正字得之甌寧人元祐中築室北山下名閑軒

秦少游為之記蘇子瞻為賦詩人以北山學士呼

蘇首望之

題釣臺

光武初從血戰回故人長短尚論材中宵若起唐虞興未

必先生戀釣臺

建寧府志得之嘗赴省試過釣臺賦詩東坡見之遂與定交

邢居實

居實字惇夫河南原武人恕子早卒有呻吟集

合璧事類前集邢惇夫有文早天東坡云敦夫自為童所與交皆諸公長者百不一見遂與草木共盡山谷云謝師復年未二十文章不類少年語

方行萬里出門而車軸折甚矣敦夫似吾師復也且有絕句云詩到隨州
更老成江山爲助筆縱橫眼看白璧埋黃壤何況人間父子情敦夫父名
恕字和叔從伊川先生學元祐初除御史後謫隨州

王直方詩話惇夫自少便多憔悴感慨之意其秋懷詩云高歌感人心心

悲將奈何棗陽道中云有意問山神此生復來否已而果卒于漢東

雪浪齋日記恕子年十四賦明妃引子瞻見而稱之由是知名病羸早天

王直方編其遺草爲呻吟集

李伯時畫黃知命騎驢圖爲賦長歌

長安城頭烏欲棲長安道上行人稀浮雲卷盡暮天碧但
有明月流清輝君獨騎驢向何處頭上倒著白接離長吟
搔首望明月不學山翁醉似泥到得城中燈火闌小兒拍
手攔街笑道旁觀者那得知相逢疑是商山皓龍眠居士
畫無比搖毫弄筆長風起酒酣闌目望窮途紙上軒昂無
乃似君不學長安游俠誇年少臂鷹挾彈章臺道君不能

提攜長劒取靈武指揮猛士驅貔虎胡爲腳踏梁宋塵終
日飄飄無定所武陵桃源春欲暮白水青山起煙霧竹杖
芒屨歸去來頭巾好挂三花樹

王直方詩話雙井黃知命初自江南來與彭城陳履常俱謁法雲禪師于
城南夜歸過龍眠李伯時知命衣白衣騎驢緣道搖頭而歌履常負杖挾
囊子後一市大驚以爲異人伯時因畫爲圖敦夫作長歌云云敦夫時年
未二十也

寄陳履常

十年客京洛衣袂多黃塵所交盡才彥唯子情相親會合
能幾日歡樂何遽央春風東北來飄我西南翔驪駒已在
門白日行且晚停觴不能飲將去更復返把腕捋髭鬚悲
啼類兒女人生非鹿豕安得常羣聚朝別河上梁暮涉關
山道匹馬逐飛蓬離恨如春草去去日已遠行行淚橫臉

昨日同袍友今朝離鄉客來時城南陌始見梅花白回首
漢江頭黃梅已堪摘杖策登高城極目迴千里落日下青
山但見白雲起遠望豈當歸長歌涕如雨歸心如明月幽
夢過潁汝抱剡長相思故人安可見忽枉數行書彷彿如
對面紛紜輦轂下冠蓋爭馳逐吹噓多賢豪冑復念幽獨
空齋聽夜雨深竹聞子規此情不可道此心君詎知

雨後出城馬上作

既雨天氣佳微雲淡如掃欲尋煙際鐘騎馬河邊草紫椹
飽黃鸝人家夏蠶老田婦踏縑車隔籬語音好嗟我一何
愚讀書浪枯槁不及此中人中年客長道

秋風三疊寄秦少游

秋風夕起兮白露爲霜草木憔悴兮竊獨悲此衆芳明月皎皎兮照空房晝日苦短兮夜未央有美一人兮天一方欲往從之路渺茫登山無車兮涉水無航願言思子兮使我心傷

秋風淅淅兮雲冥冥鳴臬晝號兮蟋蟀夜鳴歲月徂邁兮忽如流星少壯幾時兮老冉冉其相仍展轉反側兮從夜徹明悵獨處此兮誰適爲情長歌激烈兮涕泣交零願言思子兮使我心悵

秋風浩蕩兮天宇高羣山逶迤兮溪谷寂寥登高而望遠兮不自聊駕言適野兮誰與遊遨空原無人兮四顧蕭條爰猗與伍兮麋鹿爲曹浮雲千里兮歸路遙願言思子兮

使我心勞

以上宋文鑑

明妃引

十四歲作

漢宮有女顏如玉淺畫愁眉遠山綠披香殿裏夜吹笙未
央宮中朝理曲絳紗蒙籠雙蠟燭簫鼓聲傳春漏促玉輦
三更別院歸夜深月照黃金屋莓苔滿院無行迹總爲君
王未相識天上天仙骨格別人閒畫工畫不得嫣然一笑
金輿側玉貌三千斂顏色羅幃繡戶掩香風一朝返嫁單
于國金鳳羅衣爲誰縷長袖已彎不堪舞一別昭陽舊院
花淚灑臙脂作紅雨回頭不見雲開闕黃河半渡新冰滑
馬蹄已踏遼羯塵天邊尚挂長門月黃沙不似長安道薄
暮微雲映衰草胡兒馬上鳴胡笳綠鬢紅顏爲君老西風

蕭蕭易水寒啼痕不斷幾闌干年年看盡南飛鴈一去天涯
竟不還少年將軍健如虎日夕撞鐘槌大鼓寶刀生澀
旌旗卷漢宮嫁盡嬋娟女寂寞邊城日將暮三尺角弓調
白羽安得壯士霍嫖姚縛取呼韓作編戶

合璧事類前集

秋晚

目送閑雲盡日愁寒來著破舊貂裘憑誰說與西風道畱
取黃花點綴秋

後村千家詩

句

微意平生在海塵冠今日爲君彈

寄陳後山

任淵後山詩注

葛敏修

敏修字聖功廬陵人從山谷學登元祐進士宰確

山元符閒上書願附黨籍

南華竹軒

不用山僧供帳迎世閒無此竹風清獨拳一手支頤臥偷
眼看雲生未生

能改齋漫錄山谷南遷還至南華竹軒令侍史誦詩板戒勿言姓名久之
有一絕云云徐視之曰果吾學子葛敏修也

李才甫

才甫莆田人

江西泊舟後作

江水冥冥沙石陰一舸行盡春已深浪花綠蔓曳錦帶短
蘆刺水抽玉簪飢魚未沈波面筒小舫正橫溪上風清輝
濯盡遠山碧白鳥飛入蒼煙叢

山谷外集自注云太和小舫板上塵土中得此詩

蘇 邁

邁字伯達軾長子官安化令

夜坐聯句

清風來無邊明月翳復吐

坡

松聲滿虛空竹影侵半戶

邁

暗枝有驚鵲壞壁鳴飢鼠

坡

露葉耿高梧風螢落空廡微

涼感團扇古意歌白紵樂哉今夕遊獲此陪杖屨

邁

傳家

詩律細已自過宗武短詩膝上成聊以感懷祖

坡集

蘇文忠公

句

葉隨流水知何處牛帶寒鴉過別村

江鄰幾雜志蘇伯達東坡長子豪邁雖不及其父而學問語言亦勝他人子也少年作詩云云先生見之笑曰此村長官詩後東坡貶惠州伯達求

潮之安化令以便饋親果卒於官

熟穎無風時自脫半腮迎日鬪先紅

林檎 東坡志林

陳復常

復常穎州教授

紀雪中事

掠地衝風敵萬人蔽天密雪幾微塵漫山塞壑疑無地投
隙穿帷巧致身映積讀書今已老閉門高臥不緣貧遙知
更上湖邊寺一笑潛回萬寶春

侯鯖錄元祐六年汝陰久雪一日天未明東坡來召議事曰某一夕不寐
念穎人之饑欲出百餘石造餅救之老妻謂某曰子昨來陳見傅欽之言
簽判在陳賑濟有功何不問其賑濟之法某遂相召余笑謝曰已備之矣
今細民之困不過食與火耳義倉之積穀數千石可以支散以救下民作
院有炭數萬秤依原價賣之二事可濟下民坡曰吾事濟矣遂尊放積穀
賑濟奏檄上臺寺陳聞之有詩

蘇過

過字叔黨軾季子仕爲權通判中山府家穎昌營湖陰水竹數畝名曰小斜川自號斜川居士有斜川集

送曇秀詩

三年避地少經過十日論詩喜琢磨自欲灰心老南岳猶能繭足慰東坡來時野寺無魚鼓去後閑門有雀羅從此期師真似月斷雲時復挂星河

東坡題跋曇秀來惠州見余余病已絕不作詩兒子過龐能搜句時有可觀此篇始咄咄逼老人矣特爲書之以滿行囊

賦鼠鬚筆

太倉失陳紅狡兔得餘腐旣興丞相歎又發廷尉怒磔肉

餒餓貓粉髯雜霜兔插架刀稍健落紙龍蛇驚物理未易
知時來卽所遇穿墉何卑微託此得佳譽

莒溪漁隱叢話

雪

沈沈五侯居碧瓦映華棂獸炭麒麟紅銀瓶黃封揭春風
繞幄帳醉而生綺纈賜宴明光宮玉色迷金闕誰憐草門
士破壁穿飛屑

事文類聚前集

金陵上吳開府兩絕句

時平無事清吟好衛霍貪功未是奇爭似一篇人膾炙四

方傳誦臥龍詩

自注開府帥襄陽時嘗游隆中爲諸葛孔明賦詩有翻覆看
俱好之句爲世稱誦故云

廟堂陶鑄人材盡流落江淮老病身又踏槐花隨舉子思
量鄧禹是何人

式古堂書考

劉發

發元祐中華亭主簿

贈鼓琴文照大師

寶琴何所得所得甚幽微聊借絲桐韻還超智慧機霜風
悲玉軫江月入珠徽向此諸緣盡人閒孰是非

普照寺續古錄

王叔雍寄聖照大師

雍文正公旦之姪元祐中通判濠州

題三學山

五色琉璃白晝寒當年佛腳印梅檀藕絲織出三衣妙貝
葉經傳一偈難夜看聖燈紅茵菖曉驚飛石碧琅玕更聞
鸚鵡因緣塔八十山僧試說看